

Svar

matvælaráðherra við fyrirspurn frá Sigurjóni Þórðarsyni um úthlutun byggðakvóta.

1. *Er þess gætt við úthlutun byggðakvóta hvort viðtakendur ráði yfir meiri aflahlutdeild en sem nemur hámarksaflahlutdeild, sbr. 13. gr. laga um stjórn fiskveiða?*

Úthlutun byggðakvóta er sérstök úthlutun af þeim 5,3% sem dregin eru frá heildaraflamarki hvers fiskveiðiárs skv. 3. mgr. 8. gr. laga nr. 116/2006, um stjórn fiskveiða, sbr. 5. mgr. sömu greinar. Hér er því um úthlutun að ræða sem er utan aflahlutdeildarkerfisins. Þar sem verið er að úthluta aflamarki til eins árs í senn á grundvelli ákvæða 10. gr. laganna þá er ekki um úthlutun á hlutdeild að ræða. Á grundvelli ákvæða 3. mgr. 10. gr. hefur ráðherra sett reglugerð nr. 1018/2022 um úthlutun byggðakvóta til byggðarlaga á fiskveiðiárinu 2022/2023. Jafnframt hefur ráðherra sett reglugerð nr. 1370/2022 um úthlutun byggðakvóta til fiskiskipa á fiskveiðiárinu 2022/2023. Í framangreindum reglugerðum koma fram þau skilyrði sem uppfylla þarf varðandi úthlutun og afhendingu aflamarks til einstakra fiskiskipa. Ef ekki næst að afhenda allt aflamark sem til ráðstöfunar á viðkomandi fiskveiðiári þá kemur það til endurúthlutunar á næsta fiskveiðiári þar á eftir. Að framansögðu eiga því ákvæði 13. gr. ekki við þegar um úthlutun byggðakvóta er að ræða.

2. *Ef svarið við 1. tölul. er jákvætt, hvernig er þá brugðist við ef í ljós kemur að viðtakandi byggðakvóta býr yfir meiri aflahlutdeild en sem nemur hámarksaflahlutdeild?*

Vísað er til svars við 1. tölul. fyrirspurnarinnar.

3. *Ef svarið við 1. tölul. er neikvætt, hvers vegna er þess þá ekki gætt?*

Vísað er til svars við 1. tölul. fyrirspurnarinnar.

4. *Taka stjórnvöld mið af þeim sjónarmiðum sem koma fram í álitum mannréttindanefndar Sameinuðu þjóðanna í máli Arnar Snævars Sveinssonar og Erlings Sveins Haraldssonar, nr. 1306/2004, þegar teknar eru ákvarðanir sem lúta að stjórn fiskveiða og úthlutun byggðakvóta?*

Þegar teknar eru ákvarðanir sem lúta að stjórn fiskveiða og úthlutun byggðakvóta er farið eftir gildandi lögum og stjórnvaldsreglum sem gilda um mál á hverjum tíma. Vert er að nefna að þegar hafa verið gerðar breytingar á fiskveiðistjórnarkerfinu, sbr. lög nr. 32/2010, um breytingu á lögum nr. 116/2006, í framhaldi af álitum mannréttindanefndar Sameinuðu þjóðanna, sem gera það m.a. mögulegt að strandveiðiafli nýtist sem mótframlag til byggðakvóta.